

2. September 2020

De Biraat Nedderdüütsch vun'n Sleswig-Holsteenschen Landdag kümmt in't Kieler Landshuus tosamen

Landdagspräsident Klaus Schlie harr den Biraat Nedderdüütsch to en Sitten in den Plenarsaal vun'n Sleswig-Holsteenschen Landdag inlaadt. To den Biraat höört Afordneten vun all Frakschonen un Nedderdüütschwarkers ut dat ganze Land an. Dat weer de eerste Sitten, de in düt Johr maakt warrn kunn. För den Plattdüütschen Raat worr Dirk Söhren as niege Maat in den Biraat Nedderdüütsch opnahmen. All Maten vun den Plattdüütschen Raat höört vun wegen ehr Amt to den Biraat Nedderdüütsch.



Foto: Christiane Ehlers

Op den Zeddel stünnen Berichten ut de Arbeitsgruppen „Billen“ un „Medien“, vun de Zentren för Nedderdüütsch, vun dat Nedderdüütschsekretariat, vun den Nedderdüütschen Bühnenbund un vun dat IQSH. Länger diskereert hebbt de Lüüd in de Biraatssitten över dat Thema Plattdüütsch in de Medien: Dat güng dorüm, dat sik de Sprekergrupp al lange Johren plattdüütsche Narichten bi den NDR wünscht. Landdagspräsident Klaus Schlie meen ganz düütlich: Sleswig-Holsteen bruukt plattdüütsche Narichten, denn Plattdüütsch warrt na buten hen nu veel mehr wohrnahmen as fröher. De Verfaaten giff dat her, ümmer mit de Europäasche Sprakencharta in'n Ruch. De NDR-Vertreder meen, dor müsst spoort warrn, man dat leet Klaus Schlie nich gellen. Dat kunn ok an en anner Steed passeren.

Klaus Jensen, Afordneter vun de CDU, geev en Bericht över den Andrag „Niederdeutsch ist Teil der schleswig-holsteinischen Identität“ un över de Landdagsitten, in de – in grote Delen op Platt – över den Andrag debatteert worrn is. All Frakschonen vun den Landdag hebbt den Andrag tostimmt. Dor steiht in, dat dat mehr Modellscholen geven schall un dat en Lehrwark för Sek 1 kamen mutt.

Hans Stäcker vun't Ministerium för Billen, Wetenschop un Kultur, un ok Karen Nehlsen, IQSH, hebbt Bericht geven, dat de Tall vun de Modellscholen noch höger warrn kunn un dat noch mehr Nedderdüütsch anbaden warrn kann, de Lehrers un Lehrerinnen köönt sik ok wiederbillen.

Marianne Ehlers geev Bericht över den aktuellen Stand to de Charta: dat Land hett anmellt, dat dat mehr Plichten övernehmen will. De Charta warrt denn an en paar Steden natekent. Dat Plenum vun den Bundsraat mutt noch doröver besluten, un dorna mutt de Europaraat dat annehmen. All Länner in Düütschland kunnen dat so maken, man Sleswig-Holsteen is dat eerste Nedderdüütschland, dat düssen Weg gahn is. De Sprekergrupp süht dat as en gode Teken vun't Land an.